



Гүлстан АЗБАЕВА,
Алматы қалалық сотының
доғарыстағы судьясы:
**«СУДЬЯЛЫҚ ҚЫЗМЕТ –
ЗАҢГЕР МАНСАБЫНЫҢ
ҰШАР ШЫҒЫ»**

2-бет



**БАНДЫНЫ
ҚУҒАН
ХАМИТ**

8-бет

ЗАН

ZANMEDIA.KZ

✉ zangazet@mail.ru

№66 (3597) 5 қыркүйек 2023

газеті

Қоғамдық-саяси, құқықтық газет



Абдурасул Құлдашов,
«Азаматтарға арналған үкімет»
мемлекеттік корпорациясы»
коммерциялық емес акционерлік
қоғамы Алматы қалалық
филиалының директоры:

«МЕМЛЕКЕТТІК КОРПОРАЦИЯ - МЕМЛЕКЕТТІК ҚЫЗМЕТ САЛАСЫНДАҒЫ ӨЗГЕРІСТІҢ ДРАЙВЕРІ»

– Абдурасул Мақсұдұлы, «Азаматтарға арналған үкімет» мемлекеттік корпорациясы» тарапынан атқарылған жұмыстарға көпшіліктің риза екенін жиі байқаймыз. Мұндай жетістіктің кілті неде?

– «Азаматтарға арналған үкімет» мемлекеттік корпорациясы «коммерциялық емес акционерлік қоғамы, заңнамаға сәйкес, мемлекеттік қызметтер көрсету, мемлекеттік қызметтердің бірыңғай провайдерінің қызметін жүзеге асыру және электрондық нысанда мемлекеттік қызметтер көрсетуді қамтамасыз ету үшін Қазақстан Республикасы Үкіметінің 2016 жылғы 29 қаңтардағы №39 қаулысы негізінде құрылды. Корпорацияның жалғыз акционері – Қазақстан Республикасының Цифрлық даму, инновациялар және аэроғарыш өнеркәсібі министрлігі.

Мемлекеттік корпорация – мемлекеттік қызмет саласындағы өзгерістің драйвері және «халық үніне құлақ асатын мемлекет» тұжырымдамасын іске асырудағы басты құрал. Қызметіміздің басты құндылықтары:

Біріншіден, қатардағы азаматтарды және қызметкерлерді, өзге команда өкілдерін де құрметтеп, мүддесін қолдау үшін заңнама шеңберінде әрекет ету.

Екіншіден, көрсетілетін қызметтің барлық бағытында азаматтармен ашық диалог жүргізу. Үшіншіден, азаматтарға және қызметкерлерімізге адалдық. Төртіншіден, меритократия – әр топ мүшесінің қосқан үлесі мен жеткен жетістіктерін әділ әрі жан-жақты бағалау. Бесіншіден, әр уақытта жоғары нәтижеге қол жеткізу үшін бірлесе әрекет етіп, командалық рухты көтеру. Алтыншыдан, өзара көмек пен сенім мәдениетін ұстану.

– Соның ішінде Алматыдағы филиалға жүгінетіндер көп болар? Халыққа қалтқысыз, жедел қызмет ету үшін қандай шаралар қолға алынып жатыр?

– «Азаматтарға арналған үкімет» мемлекеттік корпорациясы» КЕАҚ Алматы қаласы бойынша филиалы құрамына әкімшілік персонал, өндірістік басқармалар, 13 Халыққа қызмет көрсету бөлімі (8 аудандық бөлім, 4 мамандандырылған бөлім және 1 көші-қон қызметтері орталығы), 8 тіркеу және жер кадастры бөлімі және 8 әлеуметтік қамсыздандыру бөлімі кіреді.

Осы бөлімдерден бөлек ХҚО-лар мен МХҚО-лардың ғимараттарынан тыс жерлерде мемлекеттік қызмет көрсететін секторлар ұйымдастырылған. Мәселен «Smart-Point Almaty» Жібек жолы көшесіндегі 135 үйде орналасқан.

(Соңы 5-бетте)

БҮГІНГІНІҢ БАС ТАҚЫРЫБЫ

Қасым-Жомарт ТОҚАЕВ, ҚР Президенті:

«ӘРКІМ ОТАНШЫЛ, АДАЛ БОЛСА АЛЫНБАЙТЫН АСУ ЖОҚ»



Дәстүр бойынша Парламент сессиясының ашылуында Мемлекет басшысы Қасым-Жомарт Тоқаев «Әділетті Қазақстанның экономикалық бағдары» деп аталатын Қазақстан халқына жолдауын жасап, ел дамуының негізгі бағыт-бағдарын айқындап берді. Үкіметке, Парламентке, басқа да құзырлы орындарға, тұтас халыққа жүктелген міндет, берілген тапсырма, айтылған тілек әдеттегідей ауқымды болды. Оның бірқатары бұрыннан көтеріліп жүрген мәселелер болса, енді біразы көптің көкейінде жүрсе де, айтылмай келген шаруалар. Тың бағыттар да белгіленді. Бұл жолдауда біраз кемшіліктің де беті ашылды, оның салдарымен қатар, себебі де ортаға салынды. Астарлы түрде де, тура мағынасында да үкіметке сын айтылды.

(Соңы 3-бетте)

КӨКЖИЕК

БІЛІМДІГЕ ӨРІС КЕҢ

Мемлекет басшысының тапсырмасы аясында Оқу-ағарту министрлігі білім жүйесінің сапасын арттыру бойынша бірқатар шараларды жүзеге асыруда. Осы айдан бастап 97 мың тәрбиешінің жалақысы 30 пайызға, колледж студенттерінің стипендиясы 50 пайызға өседі. Сондай-ақ, 1,4 миллионнан астам 1-4 сынып оқушылары тегін тамақпен қамтылады. 55 мың қазақстандық бала оқу жылын жаңа мектептерде бастайды. Жалпы, 2023–2024 оқу жылында 132 мың оқушыға арналған 154 жаңа мектепті пайдалануға беру жоспарлануда. Еліміздің мектептерінде ата-аналарға педагогикалық қолдау көрсету орталықтары ашылады. Бұл шаралар отандық білім сапасын арттыруға, балаларымыз үшін жайлы және қауіпсіз жағдай жасауға бағытталған.

Елімізде жаңа оқу жылында 55 мың оқушыға арналған 39 жаңа мектеп ашылады. 2023 жылдың соңына дейін барлығы 132 мың

орындық білім беру ұйымдарын пайдалануға беру жоспарлануда. ҚР Оқу-ағарту министрлігінің баспасөз қызметінің мәліметінше, 194

білім беру ұйымында күрделі жөндеу жұмыстары аяқталады. Мемлекет басшысының тапсырмасы

бойынша жыл соңына дейін шағын қалаларда, аудан орталықтарында және ауылдарда орналасқан

2023 ЖЫЛДЫҢ 1 ҚЫРКҮЙЕГІНЕН

ТӘРБИЕШІЛЕРДІҢ ЖАЛАҚЫСЫ
30%-ҒА АРТАДЫ



КОЛЛЕДЖ СТУДЕНТТЕРІНІҢ
СТИПЕНДИЯСЫ 50%-ҒА КӨТЕРІЛЕДІ

1,4 МЛН БАСТАУЫШ СЫНЫП
ОҚУШЫСЫ ТЕГІН ТАМАҚПЕН ҚАМТЫЛАДЫ



55 МЫҢ ОРЫНДЫҚ 39 МЕКТЕП
ПАЙДАЛАНУҒА БЕРІЛЕДІ

АТА-АНАЛАРДЫ ПЕДАГОГИКАЛЫҚ
ҚОЛДАУ ОРТАЛЫҚТАРЫ АШЫЛАДЫ



1000 мектеп алты бағыт бойынша жаңғыртудан өтеді: күрделі және ағымдағы жөндеу, пән кабинеттерін жабдықтау, мектеп жиһаздарын, кітапханаларды, асханаларды жаңарту, сондай-ақ балалардың қауіпсіздігін қамтамасыз ету қолға алынады. 1000 пәндік кабинет ашу жоспарлануда, сондай-ақ қосымша 749 пәндік кабинет сатып алынады.

Білім беру инфрақұрылымын қолдау қорының арқасында 1 қыркүйекке дейін 25 мың орындық 13 мектеп, сондай-ақ жергілікті бюджет және жеке инвестиция есебінен 30 мың орындық 26 мектеп ашылады. Сонымен қатар, «Жайлы мектеп» ұлттық жобасы жүзеге асырылуда, оның шеңберінде 740 мың оқушыға арналған 369 мектеп салу жоспарлануда.

Айта кетерлігі, мемлекет жыл сайын мектептердің құрылысы мен жаңғырту жұмыстарына қаржы бөліп келеді. Соңғы үш жыл ішінде 340 мың орындық 626 мектеп пайдалануға берілді.

Өз тілшіміз

ҚҰҚЫҚТЫҚ САУАТ

САНДЫҚ ЖҮЙЕ

Мемлекеттің басты ұстанымдарының бірі – халыққа сапалы қызмет көрсетіп, мүддесін қорғау, қажетті игіліктермен қамтамасыз ету. Еліміздің сот жүйесі мемлекеттік биліктің бір тармағы болғандықтан осы ұстанымдардан алшақ болмауы тиіс. Яғни, сот жүйесіндегі кез келген реформалардың басында халықтың мүддесі тұрады.

ЭЛЕКТОНДЫҚ СЕРВИСТЕР АШЫҚТЫҚТЫ АРТТЫРАДЫ

ЭКСАУМАҚТЫҚ СОТТЫЛЫҚ КҮМӘНДІ СЕЙІЛТЕДІ



Қазақстандағы ақпараттық-коммуникативтік технологиялардың дамуымен азаматтар мен мемлекеттің өзара әрекеттестігін ыңғайлы, қарапайым, қолжетімді және түсінікті ету үшін электронды үкімет жасалды.


Мемлекеттік органдарға кезекті қысқартып, анықтама, куәлік, рұқсат құжаттарын тағы басқа да қызметтерді жеңілдетуге және жылдамдатуға мүмкіндік беру үшін жасалған бағдарлама осы сандық жүйе.

Қазақстанда электрондық сот төрелігін «Сот кабинеті», «Талдау» форумы, сондай-ақ Қазақстан соттарының автоматтандырылған жүйесі сияқты бірқатар инновациялық сервистері, сонымен қатар республика соттары арасындағы бейнеконференц байланыс жүйесі жүзеге асырылады.

«Сот кабинеті» сервисі 2014 жылы іске қосылды. Сервис арқылы сот органдарына түрлі электронды арыздар, шағымдар, түрлі өтініштер жіберуге болады.

Шағымдарды халыққа қызмет көрсету орталығы арқылы жолдауға болады. Жоғарғы Сот халыққа қызмет көрсету орталықтарымен бірлесіп, өзіне-өзі қызмет көрсету бұрыштарын ұйымдастырды. Халыққа қызмет көрсету орталығынан азаматтар «Сот кабинеті» сервисі арқылы сотқа өз бетінше, кезек күтпестен талап арыз, шағым, өтініш-хат бере алады.

Бұл бұрышты пайдаланудың мақсатты аудиториясы электронды шағымдар мен құжаттарды тапсыру үшін интернетке қол жеткізе алмайтын адамдар. Халыққа қызмет көрсету орталықтарына жүгінген кезде азаматтар электрондық цифрлық қолтаңбаны (ЭЦҚ) алады. Өз кезегінде ХҚО-ның жауапты қызметкерлері мемлекеттік қызмет көрсету аясында азаматтарға «Сот кабинеті» сервисі арқылы



электронды өтініш беру кезінде консультативтік және практикалық көмек көрсетеді.

Халыққа қызмет көрсету орталықтарында мұндай бұрыштардың ашылуы сот құжаттарын беру механизмін жеңілдетеді, тұрғындардың уақыты мен қаржысын үнемдейді, бюрократиялық кедергілерді алып тастайды, сот жүйесі қызметкерлері мен азаматтар арасындағы байланысты азайтады, сыбайлас жемқорлықты азайтуға ықпал етеді.

Талдау форумын Қазақстан Республикасының Жоғарғы Соты ресми интернет-ресурсында да іске қосты, ол істер мен материалдар санаттарын бірыңғай жіктеу негізінде қалыптастырылады және мыналарды қамтиды:

- сот тәжірибесін жалпылау;
- істер санаттарының бірыңғай классификаторы;
- сот актілерінің банкі;
- ҚР Жоғарғы Сотының нормативтік қаулылары.

Бұл сервис барлық санаттағы істер бойынша сот тәжірибесіне жедел қол жеткізуді қамтамасыз етуге мүмкіндік береді. Оның бірден-бір шарты – «Сот кабинеті» сервисіне тіркелу, яғни кез келген адам өз дауы бойынша кеңес алу үшін адвокатқа жүгінбей-ақ, компьютерде отырып, қызығушылық санаттары бойынша шешімдерді, жалпылама мәліметтерді оқи алады.

Сот жүйесінің «Төрелік» ақпараттық-талдау жүйесі автоматтандырылған есепке алуды және процессуалдық мерзімдердің сақталуын бақылауды енгізуге, статистикалық және талдамалық есептерді жасауға, іс жүргізуді және сот ісін жүргізуді жеңілдетуге бағытталған, сонымен қатар «Сот кабинеті», дыбыс-бейне жазба, кадр жүйесі сервистерін, сот құжаттарының электрондық мұрағаты, ішкі порталы және сот процесіне қатысушыларды SMS хабарламалар мен электронды пошта арқылы хабардар ету жүйелерді, Құқықтық статистика және арнайы есепке алу комитетінің қажетті ақпараттық база біріктіру жүйесімен, мемлекеттік баж төлеу базасымен, сот актілерін орындау жүйелерімен қамтиды.

Жаңа электрондық сервистер сот жүйесінің қолжетімділігіне, ашықтығына бағытталған.

Осылайша, электронды үкімет – мемлекет пен азаматтардың, сондай-ақ мемлекеттік органдардың бір-бірімен өзара әрекеттесуінің, ақпараттық технологиялардың көмегімен олардың жүйелілігін қамтамасыз ететін біртұтас механизм.

Асель САЛИХОВА,
Жәнібек аудандық соты
әкімшісінің басшысы
БАТЫС ҚАЗАҚСТАН ОБЛЫСЫ

Сот жүйесінде қолға алынған бастамалардың, жаңа жобалардың, соны өзгерістердің негізгі мақсаты – азаматтардың құқығы мен бостандығын мінсіз, сапалы қорғауға, қолжетімді қызмет көрсетуге бағытталған. Ал ол өз кезегінде соттың ашықтығы мен жариялылығын қамтамасыз ету болып табылады.

Осы үдеден шығу жолында «ҚР кейбір заңнамалық актілеріне азаматтық процестік заңнаманы жетілдіру, дауларды соттан тыс және сотқа дейінгі реттеу институттарын дамыту мәселелері бойынша өзгерістер мен толықтырулар енгізу туралы» 2021 жылғы 20 желтоқсандағы ҚР заңымен Азаматтық процестік кодексіне «эксаумақтық соттылық» ұғымы енгізілді.

Соттылық дегеніміз – бірінші сатыдағы соттарда қаралуға жататын істерді құзыреттілігі бойынша соттар арасында бөлу, яғни азаматтық істі қарауға тиісті нақты сотты белгілеу. Өзінің келісімінсіз ешкімге ол үшін заңда көзделген соттылық өзгертілмейді.

АПК-нің 32-бабына сәйкес тараптар өзара келісім бойынша іс үшін эксаумақтық соттылықты таңдай алады. Тараптардың мұндай таңдауы – оларға өзара келісім бойынша істі сот талқылауына дайындау сатысында осы іс үшін, оның ішінде соттың іс жүргізуінде жатқан істер бойынша аумақтық соттылықты өзгерту, эксаумақтық соттылықты таңдау құқығын береді. Соттың тараптардың орналасқан жерінен қашықтығы ешқандай қиындық туғызбайды, өйткені, олар бейнеконференц байланыс арқылы

онлайн режимде процеске қатыса алады.

Жалпы алғанда, эксаумақтық соттылықты қолдану – тараптардың міндеті емес, құқығы. Судья азаматтық іс қозғағаннан кейін оны сот талқылауына дайындау туралы ұйғарым шығарған кезде онда тараптардың эксаумақтық соттылықты қолдану мүмкіндігін түсіндіреді. Ал тараптар болса өз құқықтарын пайдалана отырып, істі аумақтан тыс соттылықты қолдану туралы өтініш-хат келтіре алады. Бұл өзгеріс өз кезегінде азаматтардың сотқа деген сенімін нығайтуға, артық әуреден құтылуына көмектеседі.

Сонымен қатар, тараптар арасындағы артық күмәнді сейілетіні тағы бар. Себебі, талап қоюшы Алматы қаласында, жауапкер Қызылорда қаласында орналасса, талап қою бойынша азаматтық істі Қызылорда қаласындағы соттардың бірінде қаралып, шешім жауапкер пайдасына шықты делік. Бұл жерде соттың шешімі заңды болғанның өзінде талап қоюшы күмәнмен қарауы заңдылық. Осындай келеңсіз жайттарды болдырмау үшін тараптар өзара келісіп, істі қарау үшін басқа облыстағы сотты таңдайды деген сөз. Бұл тетік өз кезегінде тиімді нәтижесін де беріп келеді.

Соттылықтың аталған түрі 2022 жылдың 1 тамызынан бастап жұмыс жасап келе жатқанын айта кеткен жөн.

Айнұр ӘБІЛҚАЙЫСҚЫЗЫ,
Қызылорда облысы
мамандандырылған
ауданаралық экономикалық
сотының судьясы

ГЕНДЕР

МЕДИАЦИЯ

ӘЙЕЛ ҚҰҚЫҒЫ АЛДЫҒЫ ОРЫНДА

ОТБАСЫ МҮДДЕСІ БӘРІНЕН БИІК

Еліміз тәуелсіздіктің алғашқы жылдарынан бастап гендерлік теңдік мәселесіне айрықша көңіл бөлді.



Бірінші рет заңнамада гендерлік теңдік деген ұғым бекітілді, ол ер мен әйелдің жынысына қарамастан өмірдің саяси, әлеуметтік, қоғамдық және мәдени салаларына белсене қатысуға нақты қол жеткізу және теңдей мүмкіндік, теңқұқықты қамтамасыз ететін құқықтық мәртебе деп танылады. Соның айғағы әйелдердің қоғамдық өмірде өз орнын табуы, саяси экономикалық жылжуы, әйелдер және олардың отбасы денсаулығының жақсаруы. Қазіргі кезде гендерлік теңсіздік мәселесі арақидік болса да кездесіп қалады. Әйел құқығы. Қазақтың байырғы әдет-ғұрыптық заңы бойынша адамның әлеуметтік ортадағы орны мен міндетін білдіретін және мүліктік меншікті иеленудегі үлесін айқындайтын құқықтық нормалар жиынтығы. Бізде әйелдер құқығын қорғайтын заң бар. Бірақ сол заңды білмегендіктен әйелдердің өздері пайдалана алмайтын кездер болады. Мемлекет басшысы партиялар туралы заңға өзгеріс енгізген тұста саяси партиялардың депутат болудан үмітті адамдары тізімінде әйелдер мен жастардың 30 пайыздық үлесі болуға тиіс екені айтылады. Әйелдер осы құқығын пайдаланып, саясатқа араласып, онымен айналысады деп ойлаймын.

ҚР Ата Заңында «Біздің мемлекеттің ең басты байлығы, қазынасы – адам және оның өмірі, құқықтары мен бостандықтары» делінген. Осыған сәйкес елімізде адам және оның өмірі үшін барлық жағдайлар жасалып жатыр.

Ата Заңымызда «Балаларына қорғалық жасау және оларды тәрбиелеу ата-ананың табиғи құқығы, әрі парызы» – делінген. Отбасындағы ата-ана мен бала арасындағы қарым-қатынас ең басты іс-әрекет-

тердің бірі. Ал олардың арасында түсініспеушілік жағдай туындаған кезде дау шығып, шаңырақ шайқалады. Осындай дауларды шешу үшін бұрын билердің төрелігіне жүгінген. Қазіргі таңда дауларды

реттеудің жаңа түрі «Медиация туралы» жаңа заңда жан-жақты көрсетілген. Медиация азаматтық, еңбекке қатысты, отбасылық және басқадай құқықтық қатынастарға байланысты, сондай-ақ ауырлығы шағын және орташа қылмыстық істер жөнінде туындаған дауларда қолданылады. Отбасылық медиация бойынша жұмыстардың негізгі мақсаты – отбасында туындаған түрлі кикілжіңнің немесе түсініспеушіліктің алдын алу. Отбасындағы келіспеушіліктер, көп жағдайда өзара тіл табыса алмаудың кесірінен орын алады. Олардың көзқарастарын реттеп, ортақ шешім қабылдауға ықпал ету арқылы ең алдымен баланың мүддесін, содан кейін, отбасын сақтап қалуды ойлаған медиаторлардың еңбегін ерекше атап өту керек.

А. ЖУВАНДЫҚОВ,
Әлихан Бөкейхан
ауданының сот приставы
ҚАРАҒАНДЫ ҚАЛАСЫ

Қ.ШӘМБІЛ,
Шахтинск қаласы әкімшілік құқық
бұзушылықтар жөніндегі мамандандырылған
сотының бас маманы-сот отырысындағы хатшысы
ҚАРАҒАНДЫ ОБЛЫСЫ

